



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

09.06.2021թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ՍՑ-ՆԳ-2021/134

Հայաստանի Հանրապետության գնումների հետ կապված բողոքներ քննող անձը՝
ի դեմս Գրիգոր Ներսիսյանի,

Մասնակցությամբ՝ «Գայսաթ» ՍՊԸ-ի տնօրեն՝ Ա. Ղազարյանի (պետական գրանցման
համար՝ 80.110.01266)

«Գայսաթ» ՍՊԸ-ի լիազորված ներկայացուցիչ Վ. Խաչատրյանի (լիազորագիր՝ տրված
31.05.2021թ.),

ուսումնասիրելով Հայաստանի Հանրապետության ֆինանսների նախարարության
25.05.2021թ. թիվ 26/26-1/8345-2021 գրությամբ «Գայսաթ» ՍՊԸ-ին գնումների
գործընթացին մասնակցելու իրավունք չունեցող մասնակիցների ցուցակում ներառելու
նպատակով նախաձեռնված ընթացակարգով ներկայացված հիմքերը, պարզեցի
հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, Երևանի քաղաքապետարանի 17.05.2021թ. թիվ
01/61-11342 գրության հիման վրա, 25.05.2021թ. թիվ 26/26-1/8345-2021 գրությամբ
նախաձեռնել է «Գայսաթ» ՍՊԸ-ին (հետայսու նաև՝ Ընկերություն) գնումների
գործընթացին մասնակցելու իրավունք չունեցող մասնակիցների ցուցակում ներառելու
ընթացակարգ:

2. «Գայսաթ» ՍՊԸ-ի ներկայացրած փաստարկները և դիրքորոշումը.

«Գայսաթ» ՍՊԸ-ն Գնումների հետ կապված բողոքներ քննող անձին ուղղված գրությամբ հայտնել է հետևյալը.

« ՀՀ ֆինանսների նախարարության 25.05.2021թ. թիվ 26/26-1/8345-2021 գրությամբ նախաձեռնված «Գայսաթ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգի վերաբերյալ հայտնում ենք Ձեզ, որ «Գայսաթ» ՍՊԸ-ի և Երևանի քաղաքապետարանի միջև պայմանագիր չկնքվելու գործընթացում առկա չեն «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի հատկանիշները, քանի որ «Գայսաթ» ՍՊԸ-ն չի խախտել պայմանագրով նախատեսված կամ գնման գործընթացի շրջանակում ստանձնած որևէ պարտավորություն, չի հրաժարվել պայմանագիր կնքելուց, հայտերը բացելուց հետո չի հրաժարվել գնման գործընթացին հետագա մասնակցությունից՝ դա պայմանավորված է եղել այլ հանգամանքով:

Նախ «Գայսաթ» ՍՊԸ-ն մասնակցության հայտ է ներկայացրել Երևանի քաղաքապետարանի կողմից հայտարարված ԵՔ-ԲՄԱՇՁԲ-21/37 ծածկագրով գնանշման հարցման ընթացակարգին, ապա արդյունքում ճանաչվել է ընտրված մասնակից և 26.04.2021թ. ստացել ծանուցում պայմանագիր կնքելու, որակավորման և պայմանագրի ապահովումներ ներկայացնելու վերաբերյալ, սակայն «Գայսաթ» ՍՊԸ-ի կողմից միակողմանի ստորագրված պայմանագրերը ներկայացնելու համար անհրաժեշտ է եղել ներկայացնել նաև որակավորման և պայմանագրի ապահովումները բանկային երաշխիքի տեսքով, այստեղ առաջացել է խնդիր բանկերի հետ, որոնք հրաժարվել են տրամադրել վերոնշյալ երաշխիքները, իսկ երբ «Գայսաթ» ՍՊԸ-ն ուզեցել է Երևանի քաղաքապետարան ներկայացնել միայն իր կողմից միակողմանի ստորագրված պայմանագրերը Օրենքի 36-րդ հոդվածի 3-րդ մասով սահմանված ժամկետում և այդ ընթացքում փորձել բանկերից ստանալ որակավորման և պայմանագրի ապահովումները բանկային երաշխիքի տեսքով, ապա Երևանի քաղաքապետարանի կողմից ստացել է պատասխան, որ պայմանագիրը առանց վերոնշյալ երաշխիքների չի ընդունվի և «Գայսաթ» ՍՊԸ-ն ձեռնամուխ է եղել սահմանված ժամկետներում ստանալ դրանք, սակայն բոլոր ջանքերը եղել են ապարդյուն, իսկ կարևորը այն է, որ «Գայսաթ» ՍՊԸ-ն ԵՔ-ԲՄԱՇՁԲ-21/37 ծածկագրով գնանշման հարցման ընթացակարգին մասնակցելու

նպատակով հայտը ներկայացնելիս չէր կարող ենթադրել անգամ, որ բանկերից կստանա մերժում, քանի որ «Գայսաթ» ՍՊԸ-ն 2021թ. ընթացքում կնքել է բազում պայմանագրեր:

Հաշվի առնելով վերոգրյալը և սպասարկող բանկերի հետ բանավոր պայմանավորվածությունները իրենց կողմից երաշխիք չտրամադրելու պարզաբանումների վերաբերյալ, որոնք նաև կներկայացվեն գրավոր՝ գտնում ենք, որ «Գայսաթ» ՍՊԸ-ն չպետք է ներառվի գնումների գործընթացին մասնակցելու իրավունք չունեցող մասնակիցների ցուցակում»:

Ընկերությունը, պատշաճ ծանուցված լինելով ՍՑ-ՆԳ-2021/134 ընթացակարգի շրջանակներում 01.06.2021թ. ժամը 09:15-ին հրավիրված նիստի վերաբերյալ, տնօրենը ապահովել է իր և ներկայացուցչի մասնակցությունը, ովքեր հայտնել են վերոհիշյալ գրությամբ ներկայացված դիրքորոշումը:

3. Երևանի քաղաքապետարանի կողմից ներկայացված փաստարկները և դիրքորոշումը.

Երևանի քաղաքապետարանը (հետայսու նաև՝ Պատվիրատու) ՀՀ ֆինանսների նախարարությանն ուղղված 17.05.2021թ. թիվ 01/61-11342 գրությամբ հայտնել է հետևյալը.

«Գնումների մասին ՀՀ օրենսդրությամբ սահմանված կարգով Երևանի քաղաքապետարանի կողմից 04.02.2021թ. կազմակերպվել է ԵՔ-ԲՄԱՇՁԲ-21/37 ծածկագրով գնման ընթացակարգ:

Ընթացակարգին մասնակցության հայտ է ներկայացրել «Գայսաթ» ՍՊԸ-ն և գնահատող հանձնաժողովի որոշմամբ ճանաչվել է ընտրված մասնակից:

Անգործության ժամկետի ավարտից հետո օրենքով սահմանված կարգով 26.04.2021թ. Մասնակցին ներկայացվել է պայմանագիր կնքելու, որակավորման և պայմանագրի ապահովումներ ներկայացնելու առաջարկ: Մասնակցի կողմից սահմանված ժամկետում չի ներկայացվել ԵՔ-ԲՄԱՇՁԲ-21/37 ծածկագրով պայմանագիրը և վերը նշված ապահովումները: Համաձայն «Գնումների մասին» ՀՀ օրենքի 36-րդ հոդվածի 3-րդ մասի՝ Մասնակիցը զրկվել է պայմանագիր կնքելու իրավունքից:

Վերոգրյալ իրավական հիմքերով պայմանավորված՝ ղեկավարվելով օրենքի 6-րդ հոդվածի 1-ին մասի 6-րդ կետի բ) ենթակետով, առաջարկում եմ Մասնակցի նկատմամբ կիրառել Օրենքի 50-րդ հոդվածի 7-րդ մասի 2-րդ կետով սահմանված դրույթը»:

Պատվիրատուն, պատշաճ ծանուցված լինելով ՍՑ-ՆԳ-2021/134 ընթացակարգի շրջանակներում 01.06.2021թ. ժամը 09:15-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ՆԳ-2021/134 ընթացակարգի քննության համար էական նշանակություն ունեցող փաստերը.

ՍՑ-ՆԳ-2021/134 ընթացակարգի քննության համար էական նշանակություն ունեն հետևյալ փաստերը.

1. Երևանի քաղաքապետարանի կողմից հայտարարվել է ԵՔ-ԲՄԱՇՁԲ-21/37 ծածկագրով բաց մրցույթ, որին մասնակցելու նպատակով հայտ է ներկայացրել «Գայսաթ» ՍՊԸ-ն:

2. Ընթացակարգի գնահատող հանձնաժողովի 02.04.2021թ. նիստի թիվ 5 արձանագրության համաձայն՝ ընտրված մասնակից է ճանաչվել «Գայսաթ» ՍՊԸ-ն, այնուհետև որոշվել է, «Գնումների մասին» ՀՀ օրենքի պահանջների համաձայն հայտարարել անգործություն և անգործության ավարտից հետո հրավերով նախատեսված կարգով ընտրված մասնակցի հետ կնքել պայմանագիր:

3. Ընթացակարգի գնահատող հանձնաժողովի 12.05.2021թ. նիստի թիվ 6 արձանագրությամբ արձանագրվել է, որ Ընկերությունը Օրենքի 36-րդ հոդվածի 3-րդ մասի համաձայն զրկվել է պայմանագիր կնքելու իրավունքից, այն հիմնավորմամբ, որ «Գայսաթ» ՍՊԸ-ն պարտավոր էր պայմանագիր կնքելու մասին ծանուցումը և պայմանագրի նախագիծը ստանալուց հետո տասն աշխատանքային օրվա ընթացքում /մինչև 10.05.2021թ./ պատվիրատուին ներկայացնել հաստատված պայմանագիրը և ապահովումները, որը Ընկերության կողմից չի տրամադրվել:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 25.05.2021թ. թիվ 26/26-1/8345-2021 գրությունը, Երևանի քաղաքապետարանի 17.05.2021թ. թիվ 01/61-11342 գրությունը՝ կից

փաստաթղթերով, «Գայսաթ» ՍՊԸ-ի գրությունը՝ կից փաստաթղթով, հայտնում են հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի համաձայն՝

1. Պայմանագիր կնքվում է գնահատող հանձնաժողովի որոշման հիման վրա՝ պատվիրատուի կողմից:

2. Սույն օրենքի 10-րդ հոդվածով սահմանված անգործության ժամկետը լրանալուն հաջորդող չորս աշխատանքային օրվա ընթացքում պատվիրատուն ծանուցում է ընտրված մասնակցին՝ ներկայացնելով պայմանագիր կնքելու առաջարկը և պայմանագրի նախագիծը: Ընդ որում, պայմանագիրը կարող է կնքվել ոչ շուտ, քան սույն օրենքի 10-րդ հոդվածով սահմանված անգործության ժամկետը լրանալու օրվան հաջորդող երկրորդ աշխատանքային օրը:

3. ***Եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:*** Պայմանագրով կանխավճար նախատեսվելու դեպքում սույն կետով նախատեսված ժամկետը սահմանվում է 15 աշխատանքային օր:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 32-րդ կետի 1-ին ենթակետի գ) պարբերությամբ սահմանվում է, որ հրավերով նախատեսվում է նաև, որ՝ մասնակիցը հայտով ներկայացնում է՝ իր կողմից հաստատված հավաստում՝ ընտրված մասնակից ճանաչվելու դեպքում, օրենքի 35-րդ հոդվածով սահմանված ժամկետում, որակավորման ապահովում ներկայացնելու պարտավորության մասին:... Եթե գնման հայտով տվյալ ընթացակարգի շրջանակում գնվելիք ապրանքի, աշխատանքի կամ ծառայության գինը չի գերազանցում գնումների բազային միավորի յոթանասունապատիկը, որակավորման ապահովման չափը հավասար է ընտրված մասնակցի գնային առաջարկի տասնհինգ, իսկ գերազանցելու դեպքում՝ երեսուն տոկոսին:

Երևանի քաղաքապետարանի կողմից հայտարարվել է ԵՔ-ԲՄԱՇՁԲ-21/37 ծածկագրով բաց մրցույթ, որին մասնակցելու նպատակով հայտ է ներկայացրել «Գայսաթ» ՍՊԸ-ն:

Ընթացակարգի գնահատող հանձնաժողովի 02.04.2021թ. նիստի թիվ 5 արձանագրության համաձայն՝ ընտրված մասնակից է ճանաչվել «Գայսաթ» ՍՊԸ-ն, այնուհետև որոշվել է, «Գնումների մասին» ՀՀ օրենքի պահանջների համաձայն հայտարարել անգործություն և անգործության ավարտից հետո հրավերով նախատեսված կարգով ընտրված մասնակցի հետ կնքել պայմանագիր:

Ընթացակարգի գնահատող հանձնաժողովի 12.05.2021թ. նիստի թիվ 6 արձանագրությամբ արձանագրվել է, որ Ընկերությունը Օրենքի 36-րդ հոդվածի 3-րդ մասի համաձայն զրկվել է պայմանագիր կնքելու իրավունքից:

Օրենքի 36-րդ հոդվածի 3-րդ մասի համաձայն՝ *եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պարզվիրարություն ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:*

Այսպես, Պատվիրատուն Ընկերության ուղղված որակավորման և պայմանագրի ապահովումներ ներկայացնելու 26.04.2021թ. ծանուցմամբ հայտնել է հետևյալը. «Հիմք ընդունելով Օրենքի 36-րդ հոդվածի 1-ին և 2-րդ կետերը՝ կից Ձեզ է ներկայացվում ԵՔ-ԲՄԱՇՁԲ-21/37 կնքվելիք պայմանագրի նախագիծը, որը Ձեր հետ կարող է կնքվել հրավերով սահմանված ձևով պայմանագրի գնի տաս տոկոսի չափով պայմանագրի կատարման ապահովում ներկայացնելու դեպքում, ինչպես նաև որակավորման ապահովում պայմանագրի գնի երեսուն տոկոսի չափով:

Պայմանագրի որակավորման ապահովումը ներկայացվում է երաշխիքի կամ կանխիկ փողի ձևով: Կանխիկ փողի ձևով ներկայացած որակավորման ապահովումը պետք է փոխանցվի Կենտրոնական գանձապետարանում լիազորված մարմնի անվամբ բացված «900008000698» գանձապետական հաշվին»:

Այսպիսով՝ Պատվիրատուն 26.04.2021թ. armeps էլեկտրոնային գնումների իրականացման համակարգի միջոցով Ընկերությանը ծանուցել է պայմանագրի նախագիծը և առաջարկել տաս աշխատանքային օրվա ընթացքում պատվիրատուին ներկայացնել հաստատված պայմանագիրը և ապահովումները, իսկ արդեն ***Ընթացակարգի գնահատող հանձնաժողովի 12.05.2021թ. նիստի թիվ 6 արձանագրությամբ արձանագրվել է, որ Ընկերությունը Օրենքի 36-րդ հոդվածի 3-րդ մասի համաձայն զրկվել է պայմանագիր կնքելու իրավունքից, այն հիմնավորմամբ, որ «Գայսաթ» ՍՊԸ-ն պարտավոր էր պայմանագիր կնքելու մասին ծանուցումը և պայմանագրի նախագիծը ստանալուց հետո փաս աշխատանքային օրվա ընթացքում /մինչև 10.05.2021թ./ պարզվիրարություն ներկայացնել հաստատված պայմանագիրը և ապահովումները, որը Ընկերության կողմից չի տրամադրվել:***

Այս տեսանկյունից հարկ եմ համարում արձանագրել հետևյալը.

Ընկերությունը ՍՑ-ՆԳ-2021/134 ընթացակարգի շրջանակներում Գնումների հետ կապված բողոքներ քննող անձին է տրամադրել «Ամերիաբանկ» ՓԲԸ-ի կողմից Ընկերությանն ուղղված գրությունը հետևյալ բովանդակությամբ. «Ի պատասխան «Գայսաթ» ՍՊԸ-ի 03.06.2021թ. դիմումի՝ սույնով կրկին տեղեկացնում ենք, որ **Ընկերության կողմից «Ամերիաբանկ» ՓԲԸ 03.05.2021թ. ներկայացված կատարման և որակավորման ապահովումների /բանկային երաշխիքների/ հայտերը հաստատվել են բանկի կողմից 13.05.2021թ.-ին**»:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե որպես ընտրված մասնակից հրաժարվել է պայմանագիր կնքելուց:

ՀՀ քաղաքացիական օրենսգրքի 417-րդ հոդվածի 1-ին մասի համաձայն՝ պարտապանը պարտավորությունը չկատարելու և (կամ) անպատշաճ կատարելու համար **պարտասխանատու է մեղքի առկայության դեպքում**, եթե այլ բան նախատեսված չէ օրենքով կամ պայմանագրով:

Պարտապանը ճանաչվում է անմեղ, եթե ապացուցում է, որ ինքը պարտավորությունը պարշաճ կատարելու համար ձեռնարկել է իրենից կախված բոլոր միջոցները:

Այսպիսով՝ ուսումնասիրելով գործում առկա նյութերը, ինչպես նաև Ընկերության կողմից ԵՔ-ԲՄԱՇՁԲ-21/37 ծածկագրով ընթացակարգի շրջանակներում պարտականությունների կատարմանն ուղղված գործողությունները և դրսևորած վարքագիծը, այն է՝ Ընկերությունը պարտավորությունը պատշաճ կատարելու համար ձեռնարկել է իրենից կախված միջոցը՝ պայմանագիր կնքելու մասին ծանուցումը ստանալուց հետո՝ 03.05.2021թ., դիմել է բանկին, մինչդեռ՝ համաձայն «Ամերիաբանկ» ՓԲԸ-ի վերը նշված գրության՝ 03.05.2021թ. Ընկերության ներկայացված կատարման և որակավորման ապահովումների /բանկային երաշխիքների/ հայտերը **հաստատվել են բանկի կողմից 13.05.2021թ., փաստացի Ընկերության կողմից 10.05.2021 թվականը ներառյալ Պարտավորություն պայմանագրի և որակավորման ապահովումների չտրամադրումը պայմանավորված է եղել Ընկերության կամքից անկախ հանգամանքներով**, ուստի գտնում են, որ նման պայմաններում Ընկերության վարքագիծը չի կարող գնահատվել, որպես «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետով նախատեսված խախտում, հետևաբար գտնում են, որ

Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության Ֆինանսների նախարարության 25.05.2021թ. թիվ 26/26-1/8345-2021 գրությամբ «Գայսաթ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ